

U carru e u carretteri

Acconzatu 'nto menzu e nu giardinu
contornatu e jiuri, c'era nu trainu
vecchiu, consuntu, ben mascheratu,
ccu arta e misteri tuttu culuratu

Nu cartellu ammonia: "u carrettu è sulu ppè viduta
non è consentita alcuna seduta!"

Nu vecchiarreddhu ccu passu assai stentatu
s'avvicinau, si sentia attiratu,
u guardau tornu tornu attentamenta,
i ricordi cci tornarù nta menta.

Carru, carru
ajiu ma ti parru!
fusti cumpagnu da vita mia
com'è cchi ti trovi ammenzu sta via?

Mi conzaru ppe richiamu ddhoc'avanti
cci dezzi u nomu a ssu ristorante
e si tempi l'agriturismu è assai ricercatu
si mintunu in mostra l'arnesi do passatu.

Torchi, tilari, zappi, atturraturi,
aratri, varrili, giarri, salaturi
joghi, majiddhi, roti e carru, caddari,
petri e mulinu, orinali, gaddhoffari.

I musei su chini e robba disusata
a curunu, l'allustrunu, cci caccianu a purverata.

Caru carru, credimi, non su 'mbidiusu,
ma vala cchiù n'anzianu o nu vecchiu fusu?
E si tempi s'apprezza cchiù l'oggettu
ppe vecchiarreddhi non c'è cchiu rispettu!

Domana lassu a casiceddha mia
e tanti cosi cari, mi portanu via;
i parenti non hannu tempu ppe l'assistenza,
mi chiudunu nta na casa d'accoglienza.

Tu sulu si testimone e pò sapira
quanta fatica fici ppè i criscira.
quanti suduri, quanti privazioni e stenti
chissi sunnu mo i ringraziamenti.

Mi portanu nta na casa m'aspettu a morta
e mi rendano cchiu trista e mpama a sorta.
Na vota i vecchiarreddhi avianu rispettu e amuri
mo simu ingombriu, pisu e siccaturi.

Caru carru, non mu meritava eu so tortu
eu non moru quandu moru, eu su già mortu!